

Nekrotizirajuća sijalometaplazija je nenadano propadanje površine nepca stvarajući otvorenu ranu u

1-2 dana. Premda je oštećenje često veliko i može biti zastrašujuće, nekrotizirajuća sijalometaplazija je bezbolna. To oboljenje često prati ozljedu područja, npr. tokom popravka zuba i nestaje unutar 2 mjeseca.

U sredini nepca može nastati izbočina kosti koja sporo raste (torus). Ta tvrda izbočina je podjednako česta i bezazlena. Nastaje tokom puberteta i prisutna je cijelog života. Čak i veću izraslinu ne treba dirati ukoliko se sluznicu, koja je preko nje, ne izgrebe tokom jela ili osoba treba zubnu protezu koja će pokriti to područje.

Tumori na nepcu, kancerozni i nekancerozni, najčešće se pojavljuju u ljudi između 40-60 godina. U ranim stadijima postoji nekoliko simptoma, premda ponekad osoba može primijetiti oticanje nepca ili primijetiti da je gornja zubna proteza postala labava. Bol se razvija mnogo kasnije.

U kasnoj fazi sifilisa, na nepcu se može pojaviti šupljina (guma).

Promjene u boji na nepcu mogu nastati zbog nadražaja ili infekcije. Nepce dugotrajnog pušača lule ima bijeli, šljunkast, tvrd izgled sa mnogo crvenih tačkica (pušačko nepce). Ako ostale ranice traju dulje od 2 sedmice osoba bi trebala posjetiti doktora ili zubnog doktora.

Nakon što je osoba imala silovit oralni seks sa muškim partnerom, na nepcu se mogu pojaviti male crvene tačkice veličine glavice pribadače zbog puknutih krvnih žilica (petehije). Te tačkice nestaju kroz nekoliko dana. Takve tačkice mogu također biti znak bolesti krvi ili infektivne mononukleoze. Crvena, ispupčena područja na nepcu vrlo često nastaju zbog loše prijanjajućih zubnih proteza ili zubnih proteza koje su dulje vrijeme u ustima bez vađenja.

Općenito, sve pomične zubne naprave osim ortodontskih učvršćivača trebalo bi prije spavanja izvaditi, očistiti i staviti u posudicu sa vodom. Kod osoba sa AIDS-om na nepcu se mogu pojaviti grimizne mrljice uzrokovane Kaposijevim sarkomom. Da bi se uklonila nelagodnost i poboljšao izgled nepca doktor te mrljice može liječiti.